

rino mayor en Galicia, conf.—Don Suero, obispo de Çamora, notario del rey en Leon, conf.

Johan Ferrandez de Segouia la escriuio el anno sexto que el rey don Alfonso regno.

(*Rueda*).—Signo del rey don Alfonso.—Don Iuan Garcia mayordomo de la corte del rey la confirma.—El alferezia del rey, vaga.

XXXIII

**1257-IV-24, Murcia. Seguro a los mercaderes cristianos, moros y judíos para su comercio en el reino de Murcia.** (Museo Arqueológico Municipal de Cartagena, perg. original, vitrina)

Don Alfonso, por la gracia de Dios rey de Castiella, de Toledo, de León, de Galicia, de Sevilla, de Cordoua, de Murcia et de Jahen. A todos los mercaderes christianos et moros et iudios que esta mi carta uieren, salut et gracia. Mandouos que todos aquellos que uenir quisieredes a Murcia et a mi tierra et a mis regnos, que uengades saluos et seguros con uestro auer con uestras mercaderias et con todas uestras cosas. Et defiendo que ninguno non sea osado de uos fazer fuerça nin tuerto nin mal ninguno nin de uos tomar uestra mercaderia sinon por sus dineros o como se abiniere conuusco a uestro plazer; et aquel que dotra guisa uos la tomasse, mandargela y a dar doblada con la costa et con la mission que fiziesse en demandar lo quel forçasse. Et mando al mio almozerriff de Murcia et a todos los mis almozerriffes de mi tierra que uos onrren et que non consientan que ninguno uos faga ningun tuerto, et que uos fagan dar doblado todo aquello que uos tomaren por fuerça, et si end al fiziesse a ellos me tornaria por ello. Et otrosi, mando a todos los omnes de mis tierras et de mis regnos que uos onrren et que ninguno non sea osado de uos fazer fuerça nin tuerto nin mal ninguno, nin uos tomen otro diezmo nin otro portadgo, sinon aquellos que uos deuen tomar con derecho, ca aquel que dotra guisa lo fiziesse al cuerpo et a quanto que ouiesse me tornaria por ello.

Dada en Murcia el rey la mando XXIII dias de abril, era de mill CC nouenta et cinco annos. Gomez Dominguez la escriuio por mandado de don Garcia Perez, notario del rey.

